

**STRANKA DEMOKRATSKE AKCIJE BiH**  
**N/r gosp. Bakir Izetbegović, predsjednik Stranke**  
**Mehmeda Spahe 14**  
**71000 Sarajevo**

**PREDMET: Pismo – TRAŽIMO BOLJU I PRAVEDNIJU SDA**  
**VEZA: Naše pismo od 20.08.2015.godine**

Poštovani,

U skladu sa našim **pismom od 20.08.2015.godine, razgovorima** koje smo imali tim povodom, imajući na umu stanje u našoj zemlji i Stranci, ali i brojne izazove sa kojima se svakodnevno susrećemo, kao i odgovornost prema narodima, građanima BiH i onima koji su nas birali i očekuju od nas da ispunimo ono radi čega i jesu dali svoje povjerenje nama, kao odgovorni nosioci mandata zastupnika u PS BiH, obraćamo Vam se ponovo sa željom da ukažemo na pojave koje smatramo pogrešnim i štetnim za našu zemlju, narod i samu Stranku. Nije nam namjera da bilo ko u SDA shvata ovo pismo lično, niti da prema njemu ima izgrađen stav (samo zbog imena potpisnika) prije nego što ga i pročita, nego iskreno želimo da rukovodstvo i organi Stranke, na čelu sa Vama, prihvate dobronamjerne i demokratske stavove ljudi koji su dobili podršku od naroda da ih predstavlja u najvišem zakonodavnom tijelu u državi.

Nakon nepostojanja političke inicijative SDA za rješavanja mnogih važnih pitanja u našoj zemlji, koje smo obećali građanima na izborima, svjedoci smo da je u posljednje vrijeme bilo više promašenih inicijativa koje su dolazile od samoga vrha i istaknutih nosilaca najviših funkcija, predstavnika SDA i na koje je javnost oštro reagovala, osudila ih ili u najmanju ruku odbacila kao neprimjerene.

Neke od njih su; prijedlog da Mostar bude glavni grad Federacije BiH, da se održavanje izbora odgodi za dvije godine, da se zatvore kandidatske liste, da se u FBiH formiraju tzv. megakantoni, da se ukine Opća bolnica u Sarajevu ili pripoji Kliničkom centru, da SDA u Srebrenici, umjesto dosadašnjeg zajedničkog kandidata Ćamila Durakovića kandidira sama svoga kandidata, da se Mostar podijeli na dvije općine... Zatim, ponovo se Bosna i Hercegovina enormno zadužuje kod MMF-a i Svjetske banke bez jasne vizije šta korisno uraditi sa tim sredstvima i kako ih vratiti, pa enormno gomilanje administracije, savjetnika, učešća naših kadrova u tijelima i komisijama parlamenata i vlada koje se skupu naplaćuju i na koje javnost s pravom negativno reaguje, pa nejasan stav SDA prema obnovi tužbe BiH protiv Srbije, nejasna pozicija SDA spram nekih sudskih procesa u državi... Sve ovo ukazuje da se ne snalazimo i nismo preuzeli odgovornost da na ispravan način rješavamo probleme građana, kao i dokaz da 300.000 birača nije glasalo na proteklim izborima za ovakvo vođenje naroda i države.

Za sva ova pitanja smo lično kontaktirani, od strane građana BiH, ljudi koji su nas birali, pitani za stav i zašto to, kao Stranka, činimo i kako bi mogli glasati za takvo nešto u Parlamentu, iako smo se i lično nalazili u poziciji da kao, direktno od naroda izabrani predstavnici u najvišem zakonodavnom organu države BiH, za takve odluke i prijedloge svoje Stranke saznajemo iz medija. Nažalost, nema transparentnosti u donošenju odluka unutar SDA, nema komunikacije i argumentacije i nema uvažavanja glasa naših građana, birača i članova. A na kraju, sva takva, počesto sporna i neprihvatljiva rješenja, nameću se izabranim predstavnicima u parlamentima da ih oni legitimiraju i za njih glasaju, iako nikakve uloge u

procesu pripreme takvih rješenja nisu imali, niti su počesto takva rješenja u interesu birača koji su i izabrali svoje predstavnike u parlamente. Vidljivo je da trenutnim izmjenama Izbornog zakona želite preko svojih pravnika „zalediti“ liste i time eliminisati i mali tračak demokratičnosti izbornog procesa, čime želite da se oslobodite svih onih koji drugačije misle. **Ali ne zaboravite, promjene ne donose oni koji su pod skutima lidera ili vlasti uopće, naprotiv, promjene i napredak donose upravo oni koji drugačije misle, imaju hrabrosti da to kažu i provode stvarne reforme.** I očito je, zapravo da takvim odnosom prema izabranim predstavnicima naroda, ponovo nas smatrate „tasterima“ za glasanje i provedbu pogrešne politike uskog kruga ljudi, koji su opterećeni ličnim i familijarnim statusom, što smatramo veoma pogrešnim i što će, uvjereni smo, ako se ovako nastavi, itekako koštati i Stranku, i Državu.

Zbog svih tih stvari, a kulminirale su posljednjim najavama i stavovima predstavnika SDA o rješenju statusa Mostara i novim podjelama, te izmjenama Izbornog zakona, želimo još jednom ukazati na neophodnost redefiniranja naše politike i reforme Stranke, te našega drugačijega i pravednijega unutarnjega organizovanja. Da apsurd bude veći, za takva rješenja o Mostaru bi u Parlamentu BiH trebao glasati i jedini izabrani poslanik SDA, Bošnjak, sa prostora HNK, Salko Sokolović, koji je u potpunosti zaobiđen u pripremi prijedloga o gradu Mostaru i koji je o rješenjima koje nudi njegova Stranka saznao također iz medija. I sve to zbog toga što o nekim pitanjima misli i govori drugačije od predsjednika Stranke ili nekoga iz njegovoga uskoga kruga saradnika.

Problemi pretječu dinamiku potrebnih promjena o kojima smo u našem prvom pismu pisali. Lokalni izbori su nam na pragu. Opet smo dovedeni u poziciju blijedih reakcija u funkciji otaljavanja mandata, putovanje radi puta, bez cilja. Sile antibosanske politike imaju inicijativu, osjetile su trenutak i okolnosti globalnih pogodnosti pa nanose štete, a zbog nereverzibilnosti mnogih procesa, te štete mogubiti i nepopravljive. Političari raznih profila i kakvoće koji su Vam bliski i imaju dominantan uticaj su bezlični, nemaju hrabrosti, niti ponos bosanski. Bosni i Hercegovini nedostaju državnici. Nedostaju joj lideri koji su spremni da se suoče sa iskušenjima, te od sebe otjeraju poltrone i klimoglavce, a da u prvi plan i funkciju stave ljude sa znanjem, stavom, karakterom i ugledom u našem narodu. A za sve dobre, ali i loše poteze, narod na kraju ispostavi račun i podvuče crtu.

Kao što je općepoznato i prepoznatljivo našem narodu – principi vođenja kadrovske politike su familijarno-interesni, sa katastrofalnim posljedicama po budućnost i BiH, naroda ali i SDA na čijem ste čelu... Uklanjaju se ljudi koji znaju, a nisu poslušnici uske grupe ljudi, a dovode oni „zaslužni“ i poslušni bez ikakvog znanja ili iskustva, posebno u sigurnosnom i ekonomskom sektoru. Nema javne stručne riječi, niti misli o bilo kom pitanju, organi Stranke samo formalno raspravljaju po „važnim“ pitanjima sa unaprijed zadanim i napisanim zaključcima. To nije SDA koju smo godinama gradili i čuvali, to govore i znaju naši brojni članovi. Javnost veoma negativno percipira mnoge trenutne poteze SDA, te otvoreno danas postavljamo pitanje: sa kojim političkim kapitalom ćemo izaći na izbore i voditi dalje procese, te očuvati podršku i rezultat koji su nam građani dali na zadnjim izborima? Stoga, izražavamo svoju veliku zabrinutost!

Svjesni smo svi da nedostaje otvorena, stručna rasprava u tijelima i organima Stranke. U organe i tijela SDA ste na pojedine pozicije integrisali i one koji su dokazani protivnici Stranke. Neznamo zašto!? SDA trenutno nema odgovor na brojna važna pitanja u zemlji, a dio rukovodstva na svim nivoima se bavi razračunavanjem sa neistomišljenicima i posebno ljudima koji imaju rezultat i podršku naroda na izborima. Uradite analizu tih procesa pa vidjećete kakvu štetu nanosite i Stranci i zemlji. Teret odgovornosti za ovakvo stanje i

posljedice koje će neminovno uslijediti ne mogu i ne trebaju nositi ljudi koji ničim ne doprinose tome.

Ukazali smo na ove mogućnosti ranije i želeći da doprinesemo izgradnji BOLJE i PRAVEDNIJE SDA dostavili smo pisano svoje prijedloge za reformu SDA i izmjene Statuta, koje bi vratile povjerenje u našu ideju i Stranku. A ti prijedlozi su jednostavna, demokratska rješenja koja trebaju omogućiti da svi članovi glasaju i biraju unutar stranke svoje predstavnike na svim nivoima, a ne da to radi, u ime njih, uski broj delegata kako je dosad bio slučaj. Time bismo spriječili trenutne anomalije, da one ljude koje hoće narod i koji dobiju najveći broj glasova, neće vrh Stranke, sa njima se bavi, njih isključuje iz svih procesa donošenja odluka. Drugo, da vratimo povjerenje u izborni proces unutar Stranke na način da svaki kandidat u izborima ima pravo na jednak tretman u izornoj komisiji i biračkim odborima.. Treće, da se statutarno utvrdi obaveza preuzimanja odgovornosti za rezultat na izborima. Ako rukovodilac SDA na bilo kom nivou, ostvari najmanje isti broj glasova ili mandata kao na prethodnim izborima može nastaviti voditi Stranku, ako ne, obavezan je prepustiti mjesto drugome, koji će pokušati i moći pobijediti. To je osnovni demokratski princip, jer ljudi i članstvo očekuje od onih koji vode Stranku da pobjeđuju i jačaju rezultat, ne da gube povjerenje i podršku. I četvrto, da u procesu odabira najboljih kandidata za vršenje vlasti u BiH obavezno učestvuju ljudi koje je narod izabrao i da ta imenovanja oslikavaju zemlju u kojoj živimo, a ne kao što je slučaj trenutno, najvažnije pozicije i imenovanja su rezervisana za odabrane, bliske uskim grupama iz vrha Stranke i ne uvažavaju nit stručnost, niti ravnomjernu raspodjelu na cijelu zemlju niti rezultat koji je postignut. Uradite analizu tih imenovanja i vidjećete kolika je neravnomjerna zastupljenost i pokrivenost cijele zemlje. Da bi se to osiguralo, zato smatramo važnim da u tim procesima odabira i predlaganja kandidata učestvuju izabrani predstavnici sa prostora cijele BiH i tako će u konačnici biti ispravljen ovaj debalans i biti osigurana poštenija i ravnomjernija raspodjela resursa i kadrova. Otvorite raspravu unutar članstva u cijeloj BiH i uvjerićete se da je ovo prijedlog kojega svi podržavaju i žele da čim prije postane sastavni dio prakse unutar SDA.

U prilogu ponovo dostavljamo pismo, iz prošle godine, u kojem detaljno obrazložimo ove prijedloge i očekujemo da istim otvorite raspravu i očekujemo konačno odgovor na naše inicijative od organa SDA- Predsjedništva i Glavnog odbora Stranke.

Na sastanku kojega smo održali u augustu prošle godine, dogovoreno je da se te izmjene Statuta naprave do kraja 2015. godine, a najkasnije do februara 2016., te da će dotad ljudi koji su na Kongresu učestvovali u izbornom inženjeringu i krađi biti pomjereni sa trenutnih funkcija i na njihovo mjesto imenovani ljudi sa kredibilitetom i rezultatima. Evo na kraju smo aprila, a ništa od dogovornog još nije ispoštovano. Zato, ponovo pozivamo i očekujemo da ovo organi Stranke urade hitno i da SDA pokrene unutarnje procese demokratizacije, da se postavi red stvari koje su neophodne za pravednije i slobodnije društvo sa stručno profiliranim kadrovima, odgojenim i koji će moći odgovoriti i spriječiti negativne trendove odlaska ljudi iz BiH i osigurati posao i pravdu za ljude u BiH. U prilogu Vam dostavljamo Pregled imenovanja koje je izvršilo Vijeće ministara u ovom mandatu, dok Vlada FBiH skriva podatke o ovome, a stanje je skoro identično. Zašto je to tako!?

Zbog svih gore navedenih stvari, te brojnih članova, ljudi koji nas svakodnevno zovu i javnosti primorani smo ovako reagovati, ograditi se od pogrešnih poteza i pozvati na ispunjavanje dogovora i unutrašnju demokratizaciju koja nam je jako potrebna. Dotada ćemo, u Parlamentu BiH, kao dio Kluba poslanika SDA, pokretati i otvarati pitanja koja smatramo važnim za demokratizaciju, ravnomjeran razvoj i pravedniju BiH za koju su naši birači i glasali na posljednjim izborima.

**Na kraju želimo da još jednom podcrtamo, mi ne želimo nikakve niti pozicije niti privilegije, ne želimo ništa za sebe, mi želimo da započne proces demokratizacije SDA, jer mi smo je osnivali, gradili i čuvali sljubavlju te želimo da SDA bude i dalje ključna politička snaga Bosne i Hercegovine.**

Nadamo se da ćete ispravno shvatiti ovaj naš apel za spas SDA od onih koji joj ne pripadaju, i da ćete konačno pokrenuti procese u i oko SDA u pozitivnom smjeru.

S poštovanjem,

Prilog:

1. Pismo i prijedlog reforme i demokratizacije SDA dostavljeno u septembru 2015.
2. Pregled imenovanja koje je izvršilo Vijeće ministara u ovom mandatu.

**Poslanici u Parlamentu BiH**

**Salko Sokolović**

**Šemsudin Mehmedović**

**Senad Šepić**

**Sadik Ahmetović**

**Fuad Kasumović**

Dostaviti:

1. Predsjedniku SDA
2. Zamjeniku predsjednika SDA
3. Potpredsjednicima SDA
4. Predsjedniku GO SDA
5. Članovima Predsjedništva
6. Članovima GO SDA
7. KO/RO/OO/ Brčko distrikt SDA
8. Asocijacija žena SDA
9. Asocijacija mladih SDA
10. Asocijacija Fatma SDA